



Auszuch

Ze spiere krut ech awer ëmmer méi, datt mäi Papp „preisesch” am Krich war an datt ech e Jong vun engem Gielemännche war.

Dat wor virun allem de Fall, wann ech op d’Gaass, dat heescht an d’Louvignysgaass, spille giong. Deemools war dat nach eng richtig Geschäft- a Wunnstrooss. Énnen an den Haiser waren d’Butteker an d’Betriber an op de Stäck driwwer hunn d’Leit gewunnt. A bei schéinem Wieder hunn d’Leit „an de Fënstere geleeën” oder mat Still op den Trottoire gesiess a sech mateneen ënnerhalen. Mir Bouwen hunn an der Strooss Foussball gespilt. Schonn eleng, well ech nei an der Gaass war, gouf ech op d’Prouf gestallt an opgezunn. Dobäi koum, datt d’Noperen an hir Kanner méi oder wéineger iwwert meng Situatioun als Jong vun engem Gielemännchen Bescheid woussten. Fir ze ermoossen, wat dat deemools, just nom Krich bedeit huet, muss een sech, souwäit dat haut iwwerhaupt nach méiglech ass, an de Geescht vun där Zäit versetzen. Verständlecherweis huet no der Naziënnerdréckung de Patriotismus héich Welle geschloen, grad och bei deenen, déi net esou direkt ënner der Nazihererschaft ze leiden haten. Praktesch jidderee war op eemol e Patriot, e Resistenzler, en Nazifeind, an den Haass huet sech op all déi entlueden, vun deene gesot gouf, si wäeren am Krich preisesch gewiescht. Do gouf den eenzelne Fall net ënnersicht, et giong duer, datt e vage Verdacht op ee gefall ass, a scho war een e schwaarzt Schof. Dat heescht, onseren huet stänneg an der Angscht gelieft: Wat wëssen se vun dir, wat denken se vun dir, a virun allem, wat hunn se mat der vir? Weisen se mam Fanger op dech, soen se weider, wat se vun der wëssen, schléissen se dech aus, maachen se de Geck mat der, fänken se dech a schloen se dech, well och dat koum méi wéi eemol vir. Eemol gouf ech vun e puer Gaassebouwen aus dem Pafendall verfollegt; do hunn deemools déi sozial Fäll gewunnt, oder, wéi gesot gouf, de Pak. Obschonns ech ëm mäi Liewe gelaf sinn, hu se mech erëmkritt, brutal op de Buedem gehäit an sech op meng Äerm a Been geknéit. Ech hu gefaart, ech krit den Doudstreech, hat mech schonn opginn, mee de Chef vun der Band, e berühmte Kläpper, huet aus der Déift vu senger Broscht an Nues eng Schnuddel gezunn, eng „Spidols mat Unhänger”, wéi mer déi deemools genannt hunn, an huet mer „nëmme” riicht an d’Gesicht gerotzt. War dat en Zeeche vu Veruechtung fir de Preiss?

De Patriotismus huet héich Welle geschloen, wéi gesot, an ech hunn, fir net anescht ze sinn ewéi déi aner, an och aus echter Iwwerzeegung matgemaach, wou et nëmme giong. Sou si mer praktesch all Dag e puer Mol bei de Palais gezunn an hunn d’groussherzoglech Famill op de Balcon geruff. Fir d’éischt d’Grand-Duchesse, dann de Prënz Félix, dann de Prënz Jang an de Charel, duerno all d’Prinzessinnen, an zum Schluss hu mer skandéiert: „Alleguer, alleguer, alleguer!” bis d’ganz Famill

zesummen op de Balcon kouw. All Kéier sinn se mat engem begeeschterte „Vive“ begréisst ginn, dee crescendo a richteg Ovatiounen iwwergaangen ass. Eng Kéier stoung ech niewent engem Pafendaller. Wéi deem de Präz Jang, deem sech no fënnf Jor Krich natierlech verännert hat (ënner anerem hat hien e Schnurres oder eng Schnuddelbrems, wéi mir dat genannt hunn), zu Gesiicht krut, huet d'Begeeschterung sech bei him mat dësem kräftege Sproch Loft gemaach: „Himmelnondidjö, do leck dach ee mech am Aasch, huet d' Sau och nach e Schnauz!“ Et muss ee soen, dee jonke Präz huet a senger Uniform vun den Irish Guards net schlecht ausgesinn, a sou dierft de Pafendaller eng gewësse Vox populi zum Ausdrock bruecht hunn.

Déi direkt Nokrichszäit war iwwerhaupt, vu menger eegener Onsécherheet ofgesinn, eng opreegend Zäit, vun där mir Kanner besonnesch fasziniert waren.